

**Malaysia sertai RCEP, buka pasaran kepada sepertiga penduduk dunia -
Azmin
Astro Awani
15 November 2020
Firdaus Azil**

KUALA LUMPUR: Malaysia hari ini sah menyertai Perkongsian Ekonomi Komprehensif Serantau (RCEP) bersama 14 negara lain termasuk sembilan negara ASEAN.

Dalam satu majlis menandatangani persefahaman itu di sebuah hotel di ibu negara, Malaysia diwakili Menteri Kanan Perdagangan Antarabangsa dan Industri (MITI) Datuk Seri Mohamed Azmin Ali, sambil disaksikan Perdana Menteri Tan Sri Muhyiddin Yassin.

Susulan kekangan pergerakan akibat COVID-19, majlis itu telah diadakan melalui sidang telekonferens, yang mana Menteri-menteri berkaitan turut menandatangani dokumen berkenaan sambil disaksikan Ketua Negara masing-masing.

Mohamed Azmin, dalam siaran media susulan berkata, majlis menandatangani perjanjian tersebut adalah kemuncak kepada rundingan yang sukar dan mencabar selama 8 tahun yang melibatkan 31 pusingan rundingan, 8 Mesyuarat Menteri dan 4 Sidang Kemuncak.

“Tidak dinafikan, ia merupakan penanda aras yang penting dalam penyatuan dan pemacu pertumbuhan ekonomi diantara 15 anggota perjanjian ini.

“Tanya juga akan menjadi bukti pengukuhan sistem perdagangan pelbagai hala disamping usaha untuk memperkasakan agenda pembangunan di bawah Pertubuhan Perdagangan Dunia (WTO),” katanya lagi.

Menurut Azmin lagi, RCEP menggabungkan dan menyeragamkan FTA ASEAN+1 yang sedia ada iaitu melibatkan Jepun, Korea, China, Australia dan New Zealand, ke dalam satu perjanjian yang inklusif dan komprehensif dan bakal meningkatkan lagi perdagangan dan pelaburan antara negara-negara peserta dan serantau.

Di samping itu, ia dapat memperkuat 3 rantaian nilai serantau, dan juga memudahkan ketelusan, perkongsian maklumat dan penyelarasan peraturan dan standard teknikal.

Beliau berkata, RCEP merupakan perjanjian terbesar yang pernah ditandatangani Malaysia, melibatkan hampir sepertiga penduduk dunia (29.7%) dengan anggaran Keluaran Dalam Negara Kasar sebanyak USD24.8 bilion atau 28.9 peratus daripada keseluruhan dunia.

“Melihatkan kepada tahap pembangunan ekonomi yang berbeza diantara 2 semua anggota, RCEP bakal menyumbang kepada kelestarian Malaysia sebagai hab perdagangan dan destinasi pelaburan pilihan.

“Manfaat bagi peniaga-peniaga di Malaysia termasuklah penghapusan dan pengurangan tarif untuk barang-barang dagangan, termasuk memudahcara eksport dan import barangan di antara negara-negara RCEP,” katanya lagi.

Disamping itu Mohamed Azmin berkata, RCEP akan mempertingkat, memudahcara dan melindungi persekitaran pelaburan negara-negara peserta di rantau ini, merangkumi perkongsian maklumat dan mempertingkatkan langkah-langkah ketelusan untuk memudahkan perniagaan dan pelaburan dalam kawasan RCEP.

“RCEP mencerminkan komitmen kuat Malaysia dalam persefahaman perdagangan antarabangsa, hubungan perangkaian, sistem perdagangan pelbagai hala yang berlandaskan peraturan serta meningkatkan aliran perdagangan dan pelaburan bebas,” katanya lagi.

**© 2020 Astro Awani Network Sdn. Bhd.
(535275-D) All Rights Reserved.**

Source: <https://www.astroawani.com/berita-malaysia/malaysia-sertai-rcep-buka-pasaran-kepada-sepertiga-penduduk-dunia-azmin-268495>